

ERINDISBRÉF

Fræðslu- og frístundanefndar Sveitarfélagsins Hornafjarðar

Stjórnskipuleg staða

Fræðslu- og frístundanefnd Hornafjarðar heyrir beint undir bæjarstjórn Hornafjarðar. Starfsmaður nefndarinnar er fræðslustjóri sveitarfélagsins og sviðsstjóri fræðslu- og frístundasviðs.

Skipan, seturéttur á fundum og áheyrnaraðild

Í fræðslu- og frístundanefnd eiga sæti fimm fulltrúar kosnir af bæjarstjórn að afloknum sveitarstjórnarkosningum skv. ákvæðum *sveitarstjórnarlaga nr. 138/2011, laga um leikskóla nr. 90/2008, laga um grunnskóla nr. 91/2008, laga um fjárhagslegan stuðning við tónlistarskóla nr. 75/1985 og æskulýðslaga nr. 70/2007*. Bæjarstjórn kýs nefndinni formann og varaformann og hverjum aðalmanni er jafnframt kosinn varamaður. Hafi tveir eða fleiri flokkar eða framboðslistar haft samstarf um kosningu fræðslu- og frístundanefndar, skal framboð sem tilnefndi viðkomandi aðalman einnig tilnefna varamann hans, nema öðruvísi hafi verið ákveðið í yfirlýsingu skv. 3. og 4. mgr. 21. gr. sveitarstjórnarlaga.

Kjörtímabil fræðslu- og frístundanefndar er hið sama og bæjarstjórnar. Auk kjörinna fulltrúa eiga bæjarstjóri og starfsmaður nefndarinnar rétt til fundarsetu með málfrelsi og tillögurétti. Seturétt á fundum nefndarinnar eiga eftirtaldir fulltrúar: Einn fulltrúi skólastjóra við grunnskóla sveitarfélagsins, einn fulltrúi skólastjóra við leikskóla sveitarfélagsins, skólastjóri Tónskóla Austur-Skaftafellssýslu, einn fulltrúi kennara við grunnskóla sveitarfélagsins, einn fulltrúi starfsmanna við leikskóla sveitarfélagsins, einn fulltrúi foreldra barna í grunnskólum, einn fulltrúi foreldra barna í leikskólum og einn fulltrúi frá USÚ. Kallað er á fulltrúa þegar fjallað er um málefni sem heyra undir þá. Þá er einnig heimilt að kalla til á fundi nefndarinnar sérhvern þann er tengist málum sem fjallað er um hverju sinni. Starfsmönnum stofnana sveitarfélagsins er skylt að sitja fundi nefndarinnar sé þess óskað.

Hlutverk og verksvið

Meginhlutverk fræðslu- og frístundanefndar er að móta stefnu í fræðslu-, íþrótt- og frístundamálum sveitarfélagsins og sjá um að öll börn í sveitarfélaginu njóti lögboðinnar fræðslu. Meðal verkefna nefndarinnar er eftirfarandi:

- ◆ Að vera bæjarstjórn til ráðgjafar og veita umsögn í skólamálum.
- ◆ Að fylgjast með framkvæmd laga um grunnskóla, leikskóla, tónlistarskóla og æskulýðslaga sem og annarra laga og reglugerða er snerta starfssvið nefndarinnar.
- ◆ Að sinna mats- og eftirlitskyldum skv. lögum sem nefndin starfar eftir.
- ◆ Að gera tillögur að verkefnum í tengslum við fjárhagsáætlunargerð til bæjarráðs.
- ◆ Að fara með málefni grunnskóla, leikskóla, tónskóla og íþrótt- og frístundamála eftir því sem lög og reglugerðir ákveða.
- ◆ Að fjalla um og undirbúa gerð skólamannvirkja og nýtingu þeirra í samvinnu við umhverfis- og skipulagsnefnd.
- ◆ Að fylgjast með og stuðla að því að skólarnir eigi aðgang að sérfræðipjónustu.
- ◆ Að veita bæjarstjóra umsögn um ráðningu skólastjóra.
- ◆ Að gera tillögur til bæjarstjórnar um reglugerðir og gjaldskrár fyrir þær stofnanir sem nefndin hefur umsjón með.
- ◆ Að fara með málefni ungmennaráðs og fjalla um fundargerðir þess.



- ◆ Að fara með málefni heilsueflandi samfélags og fjalla um fundargerðir stýrihóps um heilsueflandi samfélag.
- ◆ Að koma að skipulagningu og hafa umsjón með starfsemi vinnuskóla og skólagarða í samráði við umhverfisnefnd
- ◆ Að hafa umsjón með starfsemi Vöruhúss.
- ◆ Að úthluta styrkjum til æskulýðs- og íþróttamála í umboði bæjarstjórnar.
- ◆ Að hafa umsjón með uppbyggingu, rekstri og viðhaldi á íþróttamannvirkjum og félagsaðstöðu í eigu bæjarfélagsins svo og öðrum skyldum rekstri eftir nánari ákvörðun bæjarstjórnar.
- ◆ Að vinna að eflingu félagsstarfs meðal Hornfirðinga og hafa um það samvinnu við aðra aðila sem að þeim málum koma. Leggja skal áherslu á gott samstarf við félag eldri borgara og nemendafélag FAS.
- ◆ Að hafa yfirumsjón með félagsmiðstöð ungmenna.
- ◆ Að hafa umsjón með forvarnarmálum.
- ◆ Að kalla eftir starfsáætlun á vorin fyrir íþrótt- og æskulýðsstarf á Hornafirði í samráði við aðra aðila sem slíku starfi sinna.
- ◆ Að fjalla um önnur þau mál sem bæjarstjórn felur nefndinni.

Starfshættir

Um starfshætti undirnefnda bæjarstjórnar Hornafjarðar er fjallað í VI. kafla í *samþykkt um stjórn og fundarsköp Sveitarfélagsins Hornafjarðar* og skal ákvæðum kaflans fylgt eftir því sem við á.

Nefndin kemur saman á fastákveðnum fundartíma einu sinni í mánuði, formaður stýrir fundi. Skal gerð samþykkt um þennan fundartíma á fyrsta fundi nefndarinnar að fenginni tillögu bæjarstjóra. Boðað skal til aukafunda að ákvörðun formanns eða ef a.m.k. tveir nefndarmanna óska þess. Heimilt er að fella niður fundi að sumarlagi og á öðrum tímum að mati formanns. Nefndin getur auglýst einstaka fundi sína opna en verður annars að samþykkja viðveru hvers þess sem ekki á seturétt á fundinum.

Þá getur fræðslu- og frístundanefnd staðið fyrir kynningarfundum vegna starfa sinna eða þeirra verkefna sem til umfjöllunar eru og skulu slíkir fundir öllum opnir.

Starfsmaður nefndarinnar sér um að taka á móti erindum og málum sem leggja á fyrir nefndina. Hann útbýr í samráði við formann skriflegt eða rafrænt fundarboð þar sem tilgreindur er fundarstaður og fundartími og dagskrá í tölusetnum liðum. Fundarboð skal sent öllum aðalmönnum, varamönnum og öðrum sem seturétt eiga á fundum fræðslu- og frístundanefndar.

Starfsmaður kemur undirritaðri fundargerð til starfsmanna stjórnarsýslu sem sjá um að fundargerð sé lögð fram með dagskrá næsta fundar í bæjarráði sveitarfélagsins.

Ályktanir til bæjarstjórnar og bæjarráðs skulu ætíð sendar bæjarstjóra í sérstöku erindi sem starfsmaður nefndarinnar útbýr.

Nefndarmenn skulu fá hæfilega þóknun úr bæjarsjóði fyrir störf sín samkvæmt nánari ákvörðun bæjarstjórnar.

Eftirfylgni

Fræðslu- og frístundanefnd og fræðslustjóri hafa með höndum framkvæmd þeirrar stefnu sem mótuð hefur verið á hverjum tíma varðandi fræðslumál sveitarfélagsins og æskulýðs-, íþrótt- og frístundamál. Formaður og aðrir fulltrúar í fræðslu- og frístundanefndar skulu snúa sér til bæjarstjóra til að fylgja eftir þeim ákvörðunum og samþykktum sem ekki eru alfarið á verksviði fræðslu- og frístundanefndar að framfylgja.

Réttindi og skyldur fræðslu- og frístundanefndarmanna

Um réttindi og skyldur fræðslu- og frístundanefndarmanna gilda ákvæði *sveitarstjórnarlaga* og *samþykktar um stjórn og fundarsköp Sveitarfélagsins Hornafjarðar*.



Lög og reglugerðir

Í störfum sínum skal fræðslu- og frístundanevnd taka mið af þeim lögum og reglugerðum sem snerta starfssvið hennar, Þá skal nefndin fylgja *samþykkt um stjórn og fundarsköp Sveitarfélagsins Hornafjarðar*.

Samþykkt í bæjarráði 21. júlí 2022

Sigurjón Andrésson
Bæjarstjóri